

仲景傷寒補亡論

仲景傷寒補亡論卷第十

河南郭雍譔次

不可下四十七條 可下四十八條

不可下四十七條

仲景曰脈濡而弱弱反在關

麗云關下三分也

濡反在巔

關上

三分也微反在上

寸脈也

濇反在下

尺部也

微則陽氣不足

濇則無血陽氣反微中風汗出而反躁煩濇則無血厥而且寒陽微不可下下之則心下痞鞭麗氏以氣血俱不足用小建中湯常氏云下後心下痞鞭用增

損理中丸

又曰動氣在右不可下下之則津液內竭咽燥鼻乾
頭眩心悸也龐氏以咽燥鼻乾宜竹葉湯

又曰動氣在左不可下下之則腹內拘急食不下動
氣更劇雖有身熱臥則欲蹠龐常皆云先服乾薑甘
草湯後服小建中湯

又曰動氣在上不可下下之則掌握熱煩身上浮冷
熱汗自泄欲得水自灌常氏云宜小建中湯

又曰動氣在下不可下下之則腹脹滿卒起頭眩食

則下清穀心下痞也龐氏云心下痞宜半夏瀉心湯
又曰咽中閉塞不可下下之則上輕下重水漿不下
臥則欲蹠身急痛下利日數十行常氏云咽中閉塞
可烏扇煎下利宜四逆散

又曰諸外實者不可下下之則發微熱亡脈厥者當
臍握熱雍曰宜服去白朮理中湯以朮利腰臍間血
故也

又曰諸虛者不可下下之則大渴求

一作引

水者易愈

惡水者劇雍曰宜小建中湯

又曰脈濡而弱弱反在關濡反在巔弦反在上微反在下弦爲陽運微爲陰寒上實下虛意欲得溫微弦爲虛虛者不可下也微則爲欬欬則吐涎下之則欬止而利因不休利不休則胸中如蟲齧粥入則出小便不利兩脇拘急喘息爲難頸背相引臂則不仁極寒反汗出身冷若冰眼睛不慧語言不休而穀氣多入此名除中消中一云口雖欲言舌不得前雍曰此不治之證故諸家無治法龐氏云諸脈濡弱微虛細而搏俱不可下

又曰脈濡而弱弱反在關濡反在巔浮反在上數反在下浮爲陽虛數爲亡血浮爲虛數爲熱浮爲虛自汗出而惡寒數爲痛振寒而慄微弱在關胸下爲急喘汗而不得呼吸呼吸之中痛在於脇振寒相搏形如瘡狀醫反下之故令脈數發熱狂走見鬼心下爲痞小便淋瀝小腹甚鞭小便則尿血也常氏云可小柴胡湯鵲石散延胡索散

又曰脈濡而緊濡則微氣微緊則榮中寒陽微衛中風發熱而惡寒榮緊胃氣冷微嘔心內煩醫爲有大

熱解肌而發汗亡陽虛煩躁心下苦痞堅表裏俱虛
竭卒起而頭眩客熱在皮膚悵快不得眠不知胃氣
冷緊寒在關元技巧無所施汲水灌其身客熱應時
罷慄慄而振寒重被而覆之汗出而冒顛體惕而又
振小便爲微難寒氣因水發清穀不容間嘔變反腸
出顛倒不得安手足爲微逆身冷而內煩遲欲從後
救安可復追還常氏云可灸關元雍曰仍服通脈四
逆湯

又曰脈浮而大浮爲氣實大爲血虛血虛爲無陰孤

陽獨下陰部者小便當赤而難胞中當虛今反小便利而大汗出法應衛家當微今反更實津液四射榮竭血盡乾煩而不得眠血暴內消而成暴液暴液一作黑液醫復以毒藥攻其胃此爲重虛客陽去有期必下如汚泥而死常氏云可小建中湯已經下者不治

又曰脈浮而緊浮則爲風緊則爲寒風則傷衛寒則傷榮榮衛俱病骨節煩疼當發其汗而不可下也常氏云可桂枝麻黃各半湯雍曰仲景可汗證中只用麻黃湯

又曰趺陽脈遲而緩胃氣如經也趺陽脈浮而數浮則傷胃數則動脾此非本病醫特下之所爲也榮衛內陷其數先微脈反但浮其人必大便鞭氣噫而除何以言之本以數脈動脾其數先微故知脾氣不治大便鞭氣噫而除今脈反浮其數改微邪氣獨留心中則飢邪熱不殺穀潮熱發渴數脈當遲緩脈因前後度數如法病者則飢數脈不時則生惡瘡也常氏云可小柴胡湯惡瘡漏蘆湯

又曰脈數者久數不止止則邪結正氣不能復正氣

却結於藏故邪氣浮之與皮毛相得脈數者不可下
下之必煩利不止常氏云可柴胡桂枝湯

又曰少陰病脈浮不可發汗亡陽故也陽已虛尺脈
弱濇者復不可下之雍曰宜建中湯

又曰脈浮大應發汗醫反下之此爲大逆雍曰誤下
宜四味理中丸誤下則中氣受傷故用是湯

又曰脈浮而大心下反鞭有熱屬藏者攻之不令發
汗屬府者不令洩數洩數則大便鞭汗多則熱愈汗
少則便難脈遲尙未可攻常氏云可小柴胡湯雍曰

此一證中有誤字脈經云攻之不令微汗屬府洩數則堅汗多則愈汗出小便難文皆有誤不能通

又曰二陽併病太陽初得病時發其汗汗先出不微因轉屬陽明續自微汗出不惡寒若太陽證不罷者不可下下之爲逆常氏以太陽證不罷宜柴胡桂枝湯

又曰結胸證脈浮大者不可下下之則死常氏云可小陷胸湯增損理中丸聖餅灸法

又曰太陽與陽明合病喘而胸滿者不可下常氏云

可麻黃杏子甘草石膏湯

又曰太陽與少陽併病心下鞭頸項強而眩者不可下常氏云可小柴胡湯雍曰仲景刺大椎肺俞肝俞見太陽證中

又曰諸四逆厥者不可下之虛家亦然常氏云可當歸四逆湯龐氏云若下證悉見四逆者是失下後氣血不通使然但手足微厥掌心常溫時復指稍溫卽可下之勿拘忌也

又曰病欲吐者不可下常氏云可半夏加橘皮湯

又曰太陽病有外證未解不可下下之爲逆常氏云
可桂枝麻黃各半湯雍曰依可汗證中用桂枝二麻
黃一湯

又曰病發於陽而反下之熱入曰作結胸痛發於陰
而反下之一作汗之官本及
脈經皆作下之因作痞常氏云結胸可
大陷胸湯痞可半夏瀉心湯

又曰病脈浮而緊而復下之緊反入裏則作痞常氏
云可小陷胸湯瀉心湯雍曰宜半夏瀉心湯

又曰夫病陽多者熱下之則鞭常氏云可小柴胡湯

又曰其人本虛攻其熱必噦雍曰宜半夏生薑湯類
要四味橘皮湯

又曰無陽陰強大便鞭者下之必清穀腹滿常氏云
可蜜煎導之

又曰太陰之爲病腹滿而吐食不下自利益甚時腹
自痛若下之必胸下結鞭常氏云可桂枝加芍藥湯
胸下結鞭者增損理中丸

又曰厥陰之爲病消渴氣上撞心中疼熱飢不欲
食食則吐衄下之利不止常氏云下之利不止宜四

逆湯餘見厥陰本證

又曰少陰病飲食入口則吐心中溫溫欲吐始得之手足寒脈弦遲者此胸中實不可下也常氏云飲食入口則吐可瓜蒂散餘見少陰本證

又曰傷寒五六日不結胸腹濡脈虛復厥者不可下此亡血下之死常氏云可小建中湯已下不治

又曰傷寒發熱頭痛微汗出發汗則不識人熏之則喘不得小便下之則短氣小便難頭痛背強加溫針則衄常氏云可小柴胡湯已汗者桂枝加附子湯汗

出而喘者麻黃甘草杏子石膏湯已下者五苓散加溫針者芍藥地黃湯

又曰傷寒脈陰陽俱緊惡寒發熱則脈欲厥厥者脈初來大漸漸小更來漸大是其候也如此者惡寒甚者翕翕汗出喉中痛若熱多者目赤脈多睛不慧醫須發之咽中則傷若復下之則兩目閉寒多便清穀熱多便膿血若熏之則身發黃若熨之則咽燥若小便利者可救之若小便難者爲危殆常氏云初證宜桂枝麻黃各半湯喉中痛桔梗湯熱多小柴胡湯便

清穀理中丸便膿血桃花湯身發黃茵陳蒿湯小便
難者猪苓湯

又曰傷寒發熱口中勃勃氣出頭痛目黃衄不可制
貪水者必嘔惡水者厥若下之咽中生瘡假令手足
溫者必下重便膿血頭痛目黃者若下之則兩目閉
貪水者若下之其脈必厥其聲嚶咽喉塞若發汗則
戰慄陰陽俱虛惡水者若下之則裏冷不嗜食大便
完穀出若發汗則口中傷舌上白胎煩躁脈數實不
大便六七日後必便血若發汗則小便自利也常氏

曰若熱衄不可制者芍藥地黃湯水逆者五苓散便
膿血桃花湯咽中主瘡白礬甘草散陰陽俱虛小建
中湯裏冷不嗜食理中湯發熱身黃梔子蘗皮湯餘
證小柴胡湯汗出小便數甘草乾薑湯

又曰得病二三日脈弱無太陽柴胡證煩躁心下輒
至四五日雖能食以小承氣湯少少和之令小安至
六日與大承氣一升若不大便六七日小便少者雖
不能食但初頭鞭後必溏未定成鞭攻之必溏須小
便利屎定鞭乃可攻之龐氏曰尺下弱小便不利或

尙少皆未可攻

又曰藏結無陽證不往來寒熱或寒而不熱其人反靜舌上胎滑者不可攻也常氏云可刺開元穴在臍下又曰可刺大赫在腹部第二行雍曰灸尤奇

又曰傷寒嘔多雖有陽明證不可攻之雍曰不可攻之恐厥逆也可小半夏加茯苓湯生薑橘皮湯

又曰陽明病潮熱大便秘者不可與大承氣湯不鞭者不可與之若不大便六七日恐有燥屎欲知之法少與小承氣湯入腹中轉矢氣者此有燥屎也乃

可攻之若不轉失氣者此但初頭鞭後必澹不可攻之攻之必脹滿不能食也欲飲水者與水則噦其後發熱者大便復鞭而少宜小承氣湯和之不轉失氣者慎不可攻也

又曰傷寒中風醫反下之其人下利日數十行穀不化腹中雷鳴心下痞鞭而滿乾嘔心煩不得安醫見心下痞謂病不盡復下之其痞益甚此非結熱但以胃中虛客氣上逆故使鞭也屬甘草瀉心湯

又曰下利脈大或浮大者虛也以強下之故也設脈

浮革因爾腸鳴屬當歸四逆湯

又曰陽明病面合色赤不可攻之攻之必發熱色黃小便不利也常氏云可五苓散

又曰陽明病心下鞭滿者不可攻之攻之利遂不止者死利止者愈常氏云心下鞭滿者可半夏瀉心湯已攻而利者四逆湯

又曰陽明病自汗出若發汗小便自利者此爲津液內竭雖鞭不可攻之當須自欲大便宜蜜導而通之若土瓜根及豬膽汁皆可爲導

龐氏曰不當下而強下之令人腸胃洞泄不禁而死
可下四十八條

仲景曰大法秋宜下

又曰凡服下藥宜用湯勝丸散中病便止不必盡劑
也

又曰陽明病發熱汗多者急下之宜大柴胡湯龐氏
云發熱不惡寒汗多

又曰少陰病得之二三日口燥咽乾者急下之宜大
承氣湯

又曰陽明少陽合病必下利其脈不負者順也負者失也互相尅賊名爲負也龐氏曰陽明土其脈大少陽木其脈弦若合病土被木賊加之以利則胃已困矣若脈不弦爲土不負弦者爲土負必死雍曰此合病一證下至名爲負也而終按本論原誤錄宿食一證相連非也脈經以宿食別作一證爲當蓋脈滑數有宿食故仲景可用承氣湯若胃爲木尅困而下利安有用承氣之理今依脈經離而爲二宿食證依仲景用承氣湯惟合病下利闕治法今以負爲不治不

負宜理中丸厥者宜四逆湯仍瀉邱虛陽陵泉補三里穴龐朱二氏依舊本合爲一證疑其非大抵讀仲景論仍須以脈經參校之

又曰少陰病下利清水色純青心下必痛口乾燥者可下之宜大柴胡湯大承氣湯餘見少陰本證更詳之

又曰下利三部脈皆平按之心下鞭者急下之宜大承氣湯龐氏曰凡脈沈細數爲熱在裏又兼腹滿咽乾或口燥舌乾而渴者或六七日不大便小便自如

或目中瞳子不明無外證者或汗後脈沈實者或下利三部脈皆平按之心下堅者或連發汗不惡寒者或已經下其脈浮沈按之有力者皆宜大承氣湯又曰下利脈浮而滑者內實也利未欲止當下之宜大承氣湯

雍曰常氏疑本論之誤故欲以葛根黃芩治下利殊不知仲景以承氣下宿食而合病下利原無治法也葛根黃芩湯以太陽表未解誤下之利不止者既有協熱下利之表證未退故可用今合病下利胃氣傷

因只當救胃宜用溫藥故雍以四逆理中補其法胃
氣已負而又加以寒藥則胃穀絕矣仲景於此一證
特論脈負不負蓋欲後人當思陽明少陽土木尅賊
之理而治之可謂盡善矣以是知合併病之論雖二
陽俱受病邪氣俱當去又須審二經五行之氣毋令
相尅賊抑強扶衰以致和氣不使復生一秦助桀爲
虐也如是則胡越可同舟而共濟矣此證和二經退
邪氣與人事不少異非天下至精孰能與於此然生
胃氣制少陽木亦用金石藥嘗見名醫治少陰自汗

自利不止用金液丹取大效既非古藥不敢以爲然
必不得已而用亦須七鍊九煉火力重者用之其一
煉火力輕者復可下宿食以虛人老人不敢用承氣
道

仲景問曰人病有宿食何以別之師曰寸口脈浮而
大按之反濡尺中亦微而濇故知有宿食當下之宜
大承氣湯

又曰下利不欲食者以有宿食故也當下之宜大承
氣湯

又曰下利差至其年月日時復發者以病不盡故也
當下之宜大承氣湯

又曰病腹中滿痛者此爲實也當下之宜大承氣湯
大柴胡湯

又曰下利脈反滑當有所去下之乃愈宜大承氣湯
又曰腹滿不減減不足言當下之宜大柴胡湯大承
氣湯雍曰減不足言者言不甚減也論言太陽發汗
不徹不足言與此同意俗語所謂不濟事者是也

又曰傷寒後脈沈沈者內實也下之解宜大柴胡湯

雍曰須沈數有力可下之雖沈而微弱遲皆不可下也

又曰傷寒六七日目中不了了睛不和無表裏證大便秘難身微熱者此爲實也急下之宜大承氣湯大柴胡湯

又曰太陽病未解脈陰陽俱停必先振慄汗出而解

但陰脈微

一作尺脈實

者下之而解宜大柴胡湯

一法用調胃承

氣湯脈經云但陰微者先下之而解

龐作陰實

雍曰文當從

脈經及龐氏當作但陰脈微而尺脈實者先下之而

解

又曰脈雙弦而遲者必心下鞭脈大而緊者陽中有陰也可下之宜大承氣湯

又曰結胸者項亦強如柔瘕狀下之則和龐氏云宜大陷胸丸

又曰病人無表裏證發熱七八日雖脈浮數者可下之宜大柴胡湯

又曰太陽病六七日表證仍在脈微而沈反不結胸其人發狂者以熱在下焦少腹當鞭滿而小便自利

者下血乃愈所以然者以太陽隨經瘀熱在裏故也
宜下之以抵當湯

又曰太陽病身黃脈沈結少腹鞭滿小便不利者爲
無血也小便自利其人如狂者血證諦也屬抵當湯
又曰傷寒有熱少腹滿應小便不利今反利者爲有
血也當下之宜抵當丸

又曰陽明病發熱汗出者此爲熱越不能發黃也但
頭汗出身無汗劑頸而還小便不利渴飲將水者以
瘀熱在裏身必發黃宜下之以茵陳蒿湯雍曰先服

茵陳五苓散黃退則不須更下

又曰陽明證其人喜忘者必有蓄血所以然者本有久瘀血故令喜忘屎雖鞭大便反易其色必黑宜抵當湯

又曰汗出而譫語者以有燥屎在胃中此爲風也須下者過經乃可下之下之若早語言必亂以表虛裏實故也下之愈宜大柴胡湯大承氣湯

又曰病人煩熱汗出則解復如瘧狀日晡所發熱者屬陽明也脈實者可下之宜大柴胡湯大承氣湯

又曰陽明病讞語有潮熱反不能食者胃中必有燥屎五六枚也若能食者但鞭耳屬大承氣證

又曰下利讞語者有燥屎也屬小承氣湯初一服讞語止若更衣者停後服不爾盡與之

又曰得病二三日脈弱無太陽柴胡證煩躁心下鞭至四五日雖能食以小承氣湯少少與微和之令小安至六日與承氣湯一升若不大便六七日小便少者雖不能食但初頭鞭後必溏此未成鞭也攻之必溏須小便利屎定鞭乃攻之宜大承氣湯

又曰太陽中風下利嘔逆表解者乃可攻之其人熱
熱汗出發作有時頭痛心下痞鞭滿引脇下痛乾嘔
短氣汗出不惡寒者此表解裏未和也屬十棗湯

又曰太陽病不解熱結膀胱其人如狂血自下者愈
其外未解尙未可攻當先解其外外解已但少腹急
結者乃可攻之宜桃核承氣湯龐云不惡寒爲外解
又曰傷寒七八日身黃如橘子色小便不利腹微滿
者屬茵陳蒿湯

又曰傷寒發熱汗出不解心下痞鞭嘔吐而利者屬

大柴胡湯

又曰傷寒十餘日熱結在裏復往來寒熱者屬大柴胡湯

又曰但結胸無大熱者以水結在胸脇也但頭微汗出者屬大陷胸湯

又曰傷寒六七日結胸熱實脈沉而緊心下痛按之石鞭者屬大陷胸湯

又曰陽明病其人多汗以津液外出胃中燥大便必硬鞭則譫語屬小承氣湯

又曰陽明病不吐不下心煩者屬調胃承氣湯

又曰陽明病脈遲雖汗出不惡寒者其身必重短氣
腹滿而喘有潮熱者此外欲解可攻裏也手足濇然
汗出者此大便已鞭也大承氣湯主之若汗出多微
發熱惡寒者外未解也其熱不潮未可與承氣湯若
腹大滿不通者與小承氣湯微和其胃氣勿令大泄
下

又曰陽明病潮熱大便微鞭者可與大承氣湯不鞭
者不可與之若不大便六七日恐有燥屎欲知之法

少與小承氣湯湯入腹中轉失氣者此有燥屎也乃可攻之若不轉失氣者此但初頭鞭後必溏不可攻之攻之必脹滿不能食也欲飲水者與水則噦其後發熱者大便必復鞭而少也宜小承氣湯和之不轉失氣者慎不可攻之雍曰不轉失氣者勿服藥待一晝夜熱氣不發泄定成鞭屎然後可攻

又曰陽明病譫語發熱脈滑而疾者小承氣湯主之因與承氣湯一升腹中轉失氣者更服一升若不轉失氣者勿更與之明日又不大便脈反微濇者裏虛

也爲難治不可更與承氣湯常氏云可人參黃芪建中湯

又曰二陽併病大陽證罷但發潮熱手足熱熱汗出大便難而讞語者下之則愈宜大承氣湯

又曰病人小便不利大便乍難乍易時有微熱喘冒不能臥者有燥屎也屬大承氣湯

又曰大下後六七日不大便煩不解腹滿痛者此有燥屎也所以然者本有宿食故也屬大承氣湯

龐氏曰脈朝夕駛者實癰也可下之朝平夕駛者非

癖也不可下駛謂數脈六七至者也若脈數一息八九至切不可下若下之則煩躁下利不止而死脈數與皮毛相得亦不可下也雖數爲虛客熱

又曰合下不下令人腹脹滿通身浮腫而死雍曰凡汗下皆不宜大過故汗下後易將理若汗下太過則病人虛難將理易勞復凡用大承氣亦宜消息用調胃承氣代之蓋仲景自有承氣之戒故也

仲景傷寒補亡論卷第十一

河南郭雍謹

發汗吐下後七十三條

仲景曰脈微而濇者此爲醫所病也大發其汗又數
大下之其人亡血病當惡寒後乃發熱無休止時夏
月盛暑欲著複衣冬月盛寒欲裸其身所以然者陽
微則惡寒陰弱則發熱此醫發其汗使陽氣微又大
下之令陰氣弱五月之時陰氣在裏胃中虛冷以陽
氣內微不能勝冷故欲著複衣十一月之時陽氣在

內胃中煩熱以陰氣內弱不能勝熱故欲裸其身又陰脈遲濇故知亡血也龐氏曰陽微宜四逆湯陰弱宜苦酒艾之類常氏云宜小建中湯雍曰陽微陰弱之症其候至微亦未易言仲景初謂亡血之人病當先寒後乃發熱則一病之內陽微陰弱之症先後俱見也故言醫發汗使陽氣微又大下之使陰氣弱則知一病是二證也夏月盛熱欲著複衣冬月盛寒欲裸其身謂暑月猶有寒不必重言其熱寒月猶有熱不必重言其寒也若如是則暑月有寒熱寒月亦有

寒熱非五月病者獨見寒十月病者獨見熱也故常氏用小建中湯似得其意令陰陽兩建之雖藥證相得第恐力微此外亦無藥矣龐氏分寒熱爲兩證則陽微用四逆陰弱用酸苦然疾證初不分用藥又難分也夫然則當見寒時用四逆又恐後乃發熱時熱大甚不可制若龐氏藥用之于表熱裏寒表寒裏熱之證則相宜蓋表熱裏寒表寒裏熱是自兩病非陽微陰弱同病之證也粗工以表熱裏寒表寒裏熱便爲陽微陰弱者尤非是此證雖甚希有而前人論說

尙多失仲景之意則後人用藥宜審矣

又曰寸口脈浮大而醫反下之此爲大逆浮則無血大則爲寒寒氣相搏則爲腹鳴醫乃不知而反飲冷水令汗大出水得寒氣冷必相搏其人則飢常氏云宜甘草豆蔻散

又曰太陽病三日已發汗若吐若下若溫針仍不解者此爲壞病桂枝不中與也觀其脈證知犯何逆隨證治之

又曰脈浮數者法當汗出而愈若下之身重心悸者

不可發汗當自汗出而解所以然者尺中脈微此裏虛須表裏實津液自和卽自汗出愈常氏云疑缺雍曰宜柴胡桂枝湯

又曰凡病若發汗若吐若下若亡血若亡津液陰陽自和者必自愈

又曰大下後復發汗小便不利者亡津液故也勿治之得小便利必自愈

又曰下之後復發汗必振寒脈微細所以然者內外俱虛故也常氏云可芫參建中湯

又曰本發汗而反下之此爲逆也若先發汗治不爲逆本先下之而反汗之爲逆若先下之治不爲逆雍正曰此謂病當先汗而反先下之者故爲逆若已汗而後下之不爲逆也若病當先下而反先汗之故爲逆若已下而後汗之不爲逆也

又曰太陽病先下之而不愈因復發汗以此表裏俱虛其人因致冒冒家當汗出自愈所以然者汗出表和故也得裏未和然後復下之常氏云可桂枝大柴胡湯雍正曰大字候當是兩藥先用柴胡桂枝湯和其

表復下之者用大柴胡湯

又曰得病六七日脈遲浮弱惡風寒手足溫醫二三下之不能食而脇下滿痛面目及身黃頸項強小便難者與小柴胡湯後必下重本渴飲水而嘔者柴胡不中與也食穀者噦常氏曰可柴胡桂枝 乾薑湯飲水嘔者五苓散噦者小半夏湯

又曰太陽病二三日不能臥但欲起心下必結脈微弱者此本有寒分也反下之若利止必作結胸未止者四五日復下之此作協熱利也常氏云可理中湯

結胸者大陷胸湯協熱利表不解者桂枝人參湯

又曰太陽病下之其脈促

一作緩

不結胸者此爲欲

解也脈浮者必結胸脈緊者必咽痛脈弦者必兩脇拘急脈細數者頭痛未止脈沈緊者必欲嘔脈沈滑者必協熱利脈浮滑者必下血常氏云結胸陷胸湯咽痛豬膚湯兩脇拘急小建中湯頭痛未止小柴胡湯嘔者小半夏湯協熱利者白頭翁湯下血者蘗皮湯雍曰蘗皮湯用梔子蘗皮湯

又曰太陽少陽併病而反下之成結胸心下硬下利

不止水漿不下其人心煩常氏云可陷胸湯雍曰太
少二陽水木無負因下傷胃三陽俱病輕者不成結
胸宜理中湯或無效者宜枳實理中丸

又曰脈浮而緊而復下之緊反入裏則作痞按之自
濡但氣痞耳常氏曰宜小陷胸湯增損理中丸雍曰
先枳實理中湯不解用半夏瀉心湯

又曰傷寒吐下發汗後虛煩脈甚微八九日心下痞
硬脇下痛氣上衝咽喉眩冒經脈動惕者久而成痿
常氏云可茯苓桂枝五味甘草湯成痿者振痿湯

甘草

湯未見方疑用茯苓
桂枝白朮甘草湯

又曰陽明病不能食若攻其熱必噦所以然者胃中
虛冷故也以其人本虛攻其熱必噦常氏云可溫中
湯小半夏湯雍曰宜理中湯

又曰陽明病脈遲食難用飽飽則微煩頭眩必小便
難此欲作穀疸雖下之腹滿如故所以然者脈遲故
也常氏云可茵陳湯五苓散雍曰此當煎茵陳湯一
物調五苓散作茵陳蒿湯也

又曰夫病陽多者熱下之則鞭汗多極發其汗亦鞭

常氏云可小柴胡湯

又曰太陽病寸緩關浮尺弱其人發熱汗出復惡寒
不嘔但心下痞者此以醫下之也常氏云可生薑半
夏二瀉心湯

又曰太陰之爲病腹滿而吐食不下自利益甚時腹
自痛苦下之必胸下結硬常氏云可桂枝加芍藥湯
桂枝加大黃湯雍曰本太陽病反下之因腹滿痛轉
屬太陰者桂枝加芍藥湯主之大實痛者用桂枝加
大黃湯今證吐而食不下自利腹滿自痛皆無實證

不可便用桂枝加大黃湯有微寒者當宜桂枝加附子湯存芍藥而不去也

又曰傷寒大吐大下之極虛復極出汗者其人外氣怫鬱復與之水以發其汗因得噦所以然者胃中寒冷故也常氏云可小溫中湯雍曰胃寒甚者理中湯噦者小半夏湯五苓散

又曰吐利發汗後脈平小煩者以新虛不勝穀氣故也常氏曰可調胃承氣湯雍曰勿服藥奪其食則愈以脈平不可再損也

又曰太陽病醫發汗遂發熱惡寒因復下之心下痞
表裏俱虛陰陽氣並竭無陽則陰獨復加燒針因胸
煩面色青黃膚瞶者難治今色微黃手足溫者易愈
常氏云可小柴胡湯桂枝龍骨牡蠣湯雍曰心下痞
者枳實理中丸燒針胸煩桂枝加龍骨牡蠣湯外證
未除者桂枝加人參湯

又曰太陽病得之八九日如瘧狀發熱惡寒熱多寒
少其人不嘔清便欲自可一日二三度發脈微

一作
浮

緩者爲欲愈也脈微而惡寒者此陰陽俱虛不可更

發汗更下更吐也面色反有熱色者未欲解也以其
不能得小汗出身必癢屬桂枝麻黃各半湯

又曰服桂枝湯或下之仍頭項強痛翕翕發熱無汗
心下滿微痛小便不利者屬桂枝去桂加茯苓白朮
湯

又曰太陽病先發汗不解而下之脈浮者爲不愈浮
爲在外而反下之故令不愈今脈浮故知在外當須
解外則愈宜桂枝湯雍曰此證本當先汗所謂若先
發汗治不爲逆也

又曰下之後復發汗晝日煩躁不得眠夜而安靜不嘔不渴無表證脈沈遲身無大熱者屬乾薑附子湯
雍曰此證本當先下所謂若先下之治不爲逆也

又曰傷寒若吐若下後心下逆滿氣上衝胸起則頭眩脈沈緊發汗則動經身爲振振搖者屬茯苓桂枝白朮甘草湯

又曰發汗若下之後病仍不解煩躁者茯苓四逆湯
又曰發汗吐下後虛煩不得眠若劇者必反覆顛倒心中懊懣屬梔子豉湯若少氣者梔子甘草豉湯若

吐者梔子生薑豉湯

又曰發汗若下之而煩熱胸中窒者屬梔子豉湯證
又曰太陽證過經十餘日心下溫溫欲吐胸中痛大
便反澹腹微滿鬱鬱微煩先此時自極吐下者當調
胃承氣湯若不爾者不可與但欲嘔胸中痛微澹者
此非柴胡證以嘔故知極吐下也雍曰龐氏云屬調
胃承氣湯誤也本論原無屬字不可妄加此一論當
分作二證所以本論繼之以承氣方者謂前證當用
之方非後證所屬也自若不爾之下非柴胡湯證爲

後證本論門治法宜生薑橘皮湯大半夏加橘皮湯
又曰太陽病重發汗而復下之不大便五六日舌上
燥而渴日晡所小有潮熱一云日晡所發心胸大煩從心下至少
腹鞭滿而痛不可近者屬大陷胸湯

又曰傷寒五六日已發汗而後下之胸脇滿微結小
便不利渴而不嘔但頭汗出往來寒熱心煩者此爲
未解也屬柴胡桂枝乾薑湯

又曰傷寒發汗若吐若下解後心下痞鞭噫氣不除
者屬旋覆代赭石湯

又曰傷寒大下之後復發汗心下痞惡寒者表未解也不可攻痞當先解表表解乃可攻痞解表宜桂枝湯攻痞宜大黃黃連瀉心湯

又曰傷寒若吐下後七八日不解結熱在裏表裡俱熱時時惡風大渴舌上乾燥而煩欲飲水數升者白虎加人參湯

又曰傷寒若吐若下後不解不大便五六日上至十餘日其人日晡所發潮熱不惡寒獨語如見鬼狀若劇者發則不識人循衣摸床惕而不安

一作循衣妄撮
怵惕不安

微喘直視脈弦者生瀉者死微者但發熱譫語者屬大承氣湯

又曰三陽合病腹重身重難以轉側口不仁面垢譫語遺尿發汗則譫語下之則額上生汗手足逆冷若自汗出者屬白虎湯

又曰陽明病脈浮而緊咽燥口苦腹滿而喘發熱汗出而不惡寒反惡熱身重若發汗則躁心憤憤而反譫語若加溫針必怵惕煩躁不得眠若下之則胃中空虛客氣動膈心下懊懣舌上胎者屬梔子豉湯麗

氏依論云凡用梔子湯得效卽止後服病人舊微溏者不可與之

又曰陽明病下之心中懊懣而煩胃中有燥屎者可攻其人腹微滿初頭鞭後必溏者不可攻之若有燥屎者宜大承氣湯

又曰陽明病下之其外有熱手足溫不結胸心中懊懣飢不能食但頭汗出者屬梔子豉湯

又曰太陽病若吐若下若發汗後微煩小便數大便因鞭者與小承氣湯和之愈

又曰大汗若大下利而厥冷者屬四逆湯

又曰太陽病下之後其氣上衝者可與桂枝湯若不
上衝不得與之雍曰不上衝者依後三證用桂枝去
芍藥加附子湯桂枝加厚朴杏子湯葛根黃芩黃連
湯

又曰太陽病下之後脈促胸滿者

促一作縱

屬桂枝去芍

藥湯若微惡寒者桂枝去芍藥加附子湯

本論二證脈經合爲

一

又曰太陽病桂枝證醫反下之利遂不止脈促一作縱

者表未解也喘而汗出者屬葛根黃芩黃連湯

又曰太陽病下之微喘表未解也屬桂枝加厚朴杏子湯

又曰傷寒不大便六七日頭痛有熱者與承氣湯其小便清者知不在裏仍在表也當須發汗若頭痛者必衄宜桂枝湯常氏云疑其悞當用麻黃湯及各半湯取大汗雍曰有汗當用桂枝無汗當用麻黃也詳見衄血門中

又曰傷寒五六日大下之後身熱不去心中結痛者

未欲解也屬梔子豉湯

又曰傷寒下後心煩腹滿臥起不安者屬梔子厚朴湯

又曰傷寒醫以丸藥大下之身熱不去微煩者屬梔子乾薑湯

又曰傷寒下之續得下利清穀不止身疼痛者急當救裏後身疼痛清便自調者急當救表救裏宜四逆湯救表宜桂枝湯

又曰太陽病過經十餘日反二三下之後四五日柴

何者身不丁言 卷一
胡證仍在者先與小柴胡湯嘔不止心下急其人鬱鬱微煩者爲未解可與大柴胡湯下之愈雍曰與小柴胡湯嘔止小安者勿服大柴胡也

又曰傷寒十三日不解胸脇滿而嘔日晡所發潮熱已而微利此本柴胡證下之不得利今反利者知醫以丸藥下之非其治也潮熱者實也先宜服小柴胡湯以解外後以柴胡加芒硝湯主之

又曰傷寒十三日過經譫語者以有熱也當以湯下之若小便利者大便當鞭而反下利脈調和者知醫

以丸藥下之非其治也若自下利者脈當微厥今反和者此爲內實也屬調胃承氣湯

又曰傷寒八九日下之胸滿煩驚小便不利譫語一身盡重不得轉側者屬柴胡加龍骨牡蠣湯

又曰火逆下之因燒針煩躁者屬桂枝甘草龍骨牡蠣湯

又曰太陽病脈浮而動數浮則爲風數則爲熱動則爲痛數則爲虛頭痛發熱微盜汗出而更惡寒表未解也醫反下之動數變遲膈內拒痛一作頭痛卽眩胃中空

虛客氣動膈短氣煩躁心中懊懣陽氣內陷心下因
鞭則爲結胸屬大陷胸證若不結胸但頭汗出餘處
無汗劑頸而還小便不利身必發黃常氏云可茵陳
蒿湯調五苓散

又曰傷寒五六日嘔而發熱者柴胡湯證具而以他
藥下之柴胡證仍在者復與柴胡湯此雖已下之不
爲逆必蒸蒸而振却發熱汗出而解若心下滿而鞭
痛者此爲結胸也大陷胸湯主之若但滿而不痛此
爲痞柴胡不中與之屬半夏瀉心湯

又曰本以下之故心下痞與瀉心湯痞不解其人渴

而口燥煩小便不利者屬五苓散

脈經云一方言忍之一日乃愈

又曰傷寒中風醫反下之其人下利日數十行穀不化腹中雷鳴心下痞鞭而滿乾嘔心煩不得安醫見心下痞謂病不盡復下之其痞益甚此非結熱但以胃中虛客氣上逆故使鞭也屬甘草瀉心湯

又曰傷寒服湯藥下利不止心下痞鞭服瀉心湯已復以他藥下之利不止醫以理中與之利益甚理中者理中焦此利在下焦服赤石脂禹餘糧湯復利不

止者當利其小便龐氏云可五苓散

又曰太陽病外證未除而數下之遂協熱而利利下不止心下痞鞭表裏不解者屬桂枝人參湯

又曰下後不可更行桂枝湯汗出而喘無大熱者屬麻黃杏子甘草石膏湯

又曰病人無表裏證發熱七八日脈雖浮數者可下之假令已下脈數不解合熱則消穀善飢至六七日不大便者有瘀血也屬抵當湯

又曰若脈數不解而下不止必協熱便膿血

又曰本太陽病醫反下之因而腹滿時痛者屬太陰也桂枝加芍藥湯主之大實痛者屬桂枝加大黃湯又曰傷寒六七日大下後寸脈沈而遲手足厥冷下部脈不至咽喉不利吐膿血泄利不止者爲難治屬麻黃升麻湯

又曰傷寒本是自寒下醫復吐下之寒格更逆吐下若食入口卽出屬乾薑黃芩黃連人參湯此證依脈經定

千金翼曰太下後口燥者裏虛故也

龐氏曰因發汗時汗出如水漏下還復汗少喘促不止脈促而按之濡者今當汗而解脈促而按之實者死若脈浮手足微厥面垢脣青昏憤而喘者陰陽未和氣阻升降宜服順陰湯五味子湯

又曰發汗或下後痞滿或成結胸氣塞不通宜檳榔散

仲景傷寒補亡論卷第十一終